


Misier: Ideal lo ta pa gobierno focus ariba mas diversificacion

Camara di Comercio no ta sostene proyecto di hotel na Seroe Colorado

ORANJESTAD (AAN): Gobierno di Aruba a anuncia cu lo bin un proyecto di hotel den Colony. Pa esaki a combersa cu Kawash Misier, presidente di Camara di Comercio ariba e tema aki.

Misier a bisa cu Aruba ta un isla hopi chikito y e capital tabata Oranjestad. Y unabes cu tabata tin un verschuiving pa districto di Noord, cu Oranjestad a bay atras. Y hasta e mallnan den Noord ta un poco bashi.

Si Aruba ta asina chikito cu nos no por mantene dos ciudad, con lo ta pa tres ciudad. Y con e verschuiving lo ta di Noord y Oranjestad, pa San Nicolas. Si kier desaroya San Nicolas e mester ta na full un manera diversifica cu na niun manera e



lo competi cu Oranjestad y Noord.

Sigur tur hende kier un ciudad bon, den San Nicolas. Pero e mester ta diversifica. Pa loke ta e hotel 900 camber all inclusive, Misier a bisa cu KvK semper tabata contra di proyectonan grandi, ya cu e pregunta ta keda si e ta bay diversifica Aruba,

si tur cos ta bay Seroe Colorado, si e ta bay tin su mesun souvenir, su mesun casino, shopping mall, etc.

Un otro pregunta ta cu si desaroyo di Seroe Colorado ta mesun cos cu desaroyo di San Nicolas. Unda kier tin e economia? Na San Nicolas of Seroe Colorado? Pero Missier ta bisa cu si kier tin

un desaroyo den San Nicolas, traha un hotel na San Nicolas.

E cliente cu ta bin Aruba, ta bin pa e beach, pero e mester ta un plan integral. E ora mester tuma un posicion pa cu e refineria. Tanten cu e refineria ta eynan, ta dificil pa atrae turista tambe. Camara di Comercio ta ok pa

un operador cu 900 camber, pero tambe ta ok pa duna 20 hende local un operador local pa traha 20 hotel-boutique cu 50 camber.

E diferencia ta cu si tin un hotel grandi, lo tin un accounting manager, un marketing manager, un FB manager, y hopi hende den housekeeping. Pero 50 boutique hotel lo crea hopi mas trabao pa e funcionnan aki. Hopi mas hende local lo por haya trabao.

Camara di Comercio no ta apoya e proyecto aki. Comercio ta e sector priva y ta inscribi na Camara di Comercio. Ideal lo ta pa gobierno focus ariba mas diversificacion, segun Sr. Kawish Misier, presidente di Camara di Comercio.